

Familiarization, Internalization, Articulation (FIA) Key Terms © 2025 Word Collective Released under CC BY-SA 4.0 license. Familiarization, Internalization, Articulation (FIA) Key Terms has been adapted in the following languages Tok Pisin, عربي, Français, हिंदी, Bahasa Indonesia, Português, Русский, Español, Kiswahili, 简体中文 from Familiarization, Internalization, Articulation (FIA) © 2025 Word Collective. Released under CC BY-SA 4.0 license by Mission Mutual

F

faith

Long **bilip** na long gat **feit o bilip** em i minim seim samting.

Sapos yu bilip long wanpela man o meri, yu bilip olsem wanem samting dispela man o meri i tok long em yet, em i tru. Orait yu bai trastim dispela man o meri na mekim komitmen long mekim wanem samting dispela man o meri i tokim yu long mekim.

Abraham i bin bilip olsem God i tok tru taim em i promis olsem Abraham bai gat planti **tumbuna pikinini**, maski Abraham i bin lapun pinis na i no bin gat wanpela pikinini. Abraham i bin gat trast olsem God bai inapim promis bilong em, maski dispela em i luk olsem i no inap long kamap.

Sapos yu bilip long God, yu bai wanbel olsem God i stap na wanem samting God i tok insait long Baibel em i tru. Yu gat trast olsem God bai inapim olgeta pomis bilong em, maski taim dispela promis i luk olsem em i no inap long kamap tru. Olsem na, yu sanap strong long harim tok na bihainim olgeta samting God i laikim yu long mekim.

Taim yu bilip long Jisas, yu bilip olsem Jisas em i tru tru **pikinini bilong God**. Yu gat trast olsem Jisas tru tru em i bin dai long ol **sin** bilong yu, na God em i bin **fogivim** na kisim yu. Olsem na, nau yu sanap strong long mekim olgeta samting we Jisas i tokim yu.

Baibel sampela taim i tok olsem ol manmeri i mas bilip long **nem** bilong Jisas. Dispela em i min wankain samting olsem bilip long Jisas.

Wanpela man o meri husat i gat bikipela bilip, em i save trastim God o Jisas tru tru.

Taim yu wok long trensletim disaipel, yu mas lukaut long ol dispela samting:

Insait long sampela tok ples, dispela wod “bilip” em i ken saun olsem wanpela man o meri i **hop** olsem wanpela samting em i tru, tasol i no save olsem dispela samting i tru o nogat. Dispela em i no raitpela mining. Olsem na sampela taim em i gutpela moa long yusim wanpela wod we i min olsem “trast.”

fasting

Taim wanpela man o meri i mekim **fasting**, ol i no kaikai o dring wanpela samting long wanpela hap taim.

I gat sampela taim insait long yia we **ol Israel** i sapos long fast, tasol ol manmeri i ken fast tu long ol narapela taim sapos ol i laik. Na sampela taim ol manmeri i no gat sois, na i nid long fast bikos i no gat kaikai.

Sampela taim ol manmeri i fast bikos ol i wari long sampela samting we i bin kamap.

Sampela taim ol manmeri i mekim fasting bikos ol i laik long **ripent o lusim olupela pasin**-o askim long **fogivnes**-long **ol sin** bilong ol. Pasin bilong mekim fasting em i wanpela sain bilong daunim yu yet.

Sampela taim ol manmeri i mekim fasting bikos ol i nidim God long helpim ol, o ol i laikim God long tokim ol long wanem samting long mekim. Pasin bilong fast em i bin wanpela we bilong soim God olsem wanpela problem em i bikipela.

Sampela taim ol manmeri i ting olsem sapos ol i fast, God bai amamas tru wantaim ol na givim ol wanem samting ol i laikim-tasol ol i wok long mekim sin yet. Tasol God i bin yusim ol **profet** bilong em long tokim ol manmeri olsem dispela em i rong. I no gat as bilong mekim fasting sapos yu no save harim tok bilong God tu.

Long taim bilong Jisas, sampela taim ol manmeri i save fast long mekim ol narapela manmeri i ting olsem ol i gutpela lain tru na ol i lotu lain. Tasol Jisas i tokim ol olsem ol i no ken fast long mekim ol yet i luk gut. Ol i mas no ken mekim bikipela so long fasting bilong ol long ai bilong manmeri!

Taim yu wok long trensletim fasting, yu mas lukaut long ol dispela samting:

Ol manmeri insait long planti kalsa i save long pasin bilong fasting. Taim yu trensletim wod fasting, yu mas lukaut long dispela wod insait long tok ples bilong yu we i no min fasting long onaim wanpela god, o wod we ol i save yusim long wanpela kain lotu tasol. Yu mas lukaut olsem dispela wod em ol i no yusim long minim fasting bikos long wanpela kain as tingting tasol. Yu bai nid long yusim wanpela narapela wod o toktok we i tok klia long dispela pasin bilong fasting o tambu long kaikai insait long Baibel.

fear-of-god

Taim wanpela man o meri i **pret long God**, ol i gat bikipela adoresen, ona na rispek long God. Ol i **bilip** olsem olgeta samting God i tok em i tru. Olsem na ol i save harim tok bilong God, bikos ol i save olsem ol komanmen bilong God i gutpela na God bai panisim ol sapos ol i sakim tok bilong em. Ol manmeri husat i save pret long God i save heitim tru ol samting we i

agensim ol koman bilong God. Ol manmeri i nid long pret long God, bikos God em i bikipela moa na pawaful na **holi** moa long yumi!

Taim ol manmeri i pret long God, em dispela tasol bai mekim ol i gat gutpela tingting na andastending.

Bikos Jisas i bin dai long **sin** bilong ol manmeri, nau ol manmeri i ken kam long God na i no pret long em. Tasol yumi mas gat bikipela rispek long God na luksave olsem em i gat bikipela pawa tru. Taim yumi pret long God, dispela i helpim yumi long mekim ol gutpela samting na i no ol nogut samting, bikos yumi save olsem God em i inap yet long panisim yumi.

festival-of-dedication

Festival bilong Dedikesen em i wanpela festival we ol Ju o Judamanmeri i save selebretim wanpela taim long wanpela yia. Ol i kolim insait long Baibel wanpela taim tasol, insait long buk bilong Jon. Long dispela hap bilong Baibel yumi harim olsem Jisas i visitim **Jerusalem** long taim bilong dispela festival.

Wankain olsem planti ol Ju festival, dispela festival i bin helpim ol manmeri long tingim samting we i bin kamap long taim bipo. Klostu 200 yia bipo long Jisas i bon, wanpela Grik king i bin kamap rula bilong Israel. Dispela king i bin tokim ol Ju olsem ol i nid long stop **wosipim God** bilong ol, na ol i mas stat wosipim ol Grik **god**. Planti ol Ju i rebel agensim dispela, na i bin gat planti pait. Ol soldia bilong dispela Grik king i kilim planti ol Ju, na bihain em i mekim wanpela narapela samting we i nogut tru-em i putim wanpela aidol bilong wanpela bilong ol Grik god insait long **tempel** bilong God long Jerusalem! Bikos long dispela, tempel bilong God i kamap doti tru, we i min olsem em i no gutpela olgeta long ol manmeri long lotuim God long hap. Ol Ju i no inap moa long bungim God long tempel. Tasol sampela ol Ju manmeri i bin pait wantaim ol Grik soldia, na ol i rausim ol i go autsait long Jerusalem. Bihain ol Ju i rausim dispela aidol long tempel na pefomim ol seremoni we i bai mekim tempel i klin gen-mining olsem, tempel bai fit gen long ol manmeri long wosipim God insait long em. Stat long dispela taim, olgeta yia ol Ju i save selebret long tingim dispela samting. Ol manmeri i save kolim dispela bikde olsem Festival bilong Dedikesen o Bikde bilong Givim long God na em i save stap etpela de.

festival-of-tabernacles

Festival bilong ol Tabenakel em i wanpela festival bilong ol Ju o Judamanmeri. Dispela wod tabenakel em i min olsem wanpela tent, wanpela temporeri eria bilong stap o wanpela liklik haus. Ol tent, ol temporeri eria bilong stap o ol liklik haus em ol ples we ol

manmeri i save stap insait long en, tasol em ol i no pemenen.

Taim God mekim fri **ol Israel** long wok sleiv insait long Ijip, ol Israel i bin stap raun long **wildanes** long planti yia bipo long ol i go insait long graun we God i promis long givim ol long **Kenan**. Long taim bilong ol insait long wildanes, ol i bin stap insait long ol tent na i bin muvim ol tent long wanpela ples i go long narapela ples taim ol i bin muv. Bihain, God i tokim ol Israel olsem wanpela taim long olgeta yia ol i nid long tingim dispela taim long wanpela spesel we. Olgeta yia, ol manmeri i nid long bildim wanpela temporeri eria bilong stap, o wanpela temporeri haus wantaim ol grinpela brens bilong diwai. Long 8-pela de, ol Isreal i nid long stap insait long ol dispela temporeri eria. Dispela i bin helpim ol long tingim hau God i bin lukautim ol taim ol i wok long travel long wildanes na stap insait long ol tent na i no stap insait long ol pemenen haus.

Dispela festival i bin kamap long pinis bilong havest sisen, olsem na ol manmeri i save tok tenkyu long God tu long havest long dispela festiva. Ol Israel i bin givim ol presen bilong **sekrifais** i go long God na ol narapela **ofaring** long dispela etpela de bilong festival.

Olgeta manmeri, o ol man, i nid long go long **Jerusalem** long dispela festival. Yu ken tingim hau nais dispela siti i luk wantaim ol liklik eria bilong stap we ol manmeri i mekim wantaim ol grinpela brens long olgeta ruf, strit, na open spes!

festival-of-unleavened-bread

Pasova em i wanpela impoten festival bilong ol **Ju** o Judamanmeri na ol i save kolim em tu olsem Festival o Fist De bilong Bret I No Gat Yis.

Dispela em i wanpela fist de o bik de we i save mekim ol manmeri i tingim wanpela impoten taim insait long histori bilong **Israel**.

Longpela taim i go pinis, ol tumbuna bilong **Abraham**, ol **lain Israel**, i bin kamap olsem **sleiv o wokboi nating** insait long Ijip. Ol lain Israel i bin stap long Ijip long foa handret yia! Orait God i singautim wanpela bilong ol lain Israel, Moses, long lidim ol lain Israel i kamaut long Ijip na go bek long ples **Kenan**, dispela graun we God i bin promis long givim long ol tumbuna bilong Abraham. **King** bilong Ijip i no larim dispela bikipela grup sleiv i lusim kantri bilong em nating. Dispela king i bin mekim ol samting i hat tru long ol lain Israel, tasol God i salim nainpela sik i go long ol lain Ijip long fosim king bilong ol long larim ol manmeri i go. Insait long wanwan sik, king i bin promis olsem ol lain Israel i ken go, tasol taim God i

stopim displea sik, king i senisim tingting bilong em gen. Olsem na, God i mekim namba ten i kamap nogut sik tru bilong olgeta dispela sik: God i salim wanpela **enjel** long kilim namba wan pikinini man insait long olgeta haus long Ijip. Tasol God i bin tokim ol lain Israel long kilim wanpela lemb, dispela em i wanpela animal, wanpela yangpela sipsip, na long putim **blut** bilong dispela lemb long ol pos bilong dua bilong ol haus bilong ol. Taim enjel we God i bin salim i lukim blut bilong lemb long dua bilong wanpela haus, em i skipim dispela haus na i no kilim namba wan pikinini man insait long dispela famili.

Long dispela seim nait, ol lain Israel i bin kaikai mit bilong dispela lemb long wanpela spesel we. Ol i bin kaikai dispela mit wantaim ol pait kumu na wantaim bret we ol i bin redim hariap-na em i narakain long nomol we ol i save redim bret. Nomol we bilong redim bret i save kisim longpela taim. Ol i bin kaikai dispela kaikai taim ol i sanap, dresap na redi long stat long wokabaut! Bikos long dispela nait, ol bai lusim Ijip.

Long dispela nait, wanpela enjel bilong God i kilim olgeta namba wan pikinini man insait long Ijip, tasol em i no kilim ol pikinini man bilong ol Israel, bikos ol i gat blut antap long ol dua bilong ol. Long dispela nait, king bilong Isip i larim ol Israel i go. Ol Israel i stat long wokabaut i go long graun we God i bin promis long givim ol! Ol i no sleiv moa. Stat long dispela taim na i go, ol Israel i save tingim hau God i givim ol fridom long Ijip taim ol i selebretim Pasova festivel long olgeta yia. Nem Pasova em i min olsem “long skipim na i go” o “long abrusim na wokabaut i go.” Dispela nem i mekim ol Israel i tingim hau enjel i bin skipim ol haus bilong ol Israel na i go, na i no bin kilim namba wan bikpela pikinini man bilong ol.

Olgeta taim ol Israel i selebretim Pasova, ol i kilim gen wanpela lemb na kaikai dispela mit wantaim pait kumu na wantaim bret we ol i redim hariap tru. Dispela lemb em i mekim ol i tingim hau God i seivim ol namba wan pikinini man bilong ol. Ol pait kumu i mekim ol i tingim ol samting we i hat, na ol samting ol i no swit insait long laip bilong ol we ol i bin bungim taim ol i stap olsem ol sleiv. Na dispela bret we ol i bin redim hariap i mekim ol i tingim olsem God i mekim ol i kamap fri long Ijip na ol i hariap tasol na lusim hap.

God i bin tokim ol Israel olsem Pasova fist de o bik de long olgeta yia em ol i mas bungim wantaim sevenpela Fist De Bilong Bret I No Gat Yis. Long ol dispela sevenpela de, ol i mas kaikai dispela spesel bret we ol i redim hariap. Planti taim, ol Israel i save mekim bret taim ol i larim dou, em plaua na wara i miks na i stap, ol i save larim i stap sampela aua,

o lusim long nait i kam inap moning, na bihain ol i beikim bret. Dispela longpela taim i save mekim sampela ea babel i gro insait long dou, na i mekim bret i bikpela moa na i soft moa. Olgeta taim ol i beikim bret, ol bai putim sampela dou i stap bilong yusim long narapela taim. Dispela hap leftova dou em ol i kolim wanpela liven, o yis. Narapela taim ol i bekim bret, ol bai kisim liven we ol i bin putim i stap long las taim na edim i go long nupela dou. Dispela i helpim nupela dou tu long kamap bikpela moa na soft moa.

Taim ol Israel i wok long lusim Ijip long namba wan Pasova nait, ol i no bin gat inap taim long beikim bret long dispela we. Na God i tokim ol long mekim bret we i no gat liven Bret we ol i wokim na i no gat liven em i flet na i no tik; em i olsem plaua na wara we yu miksim na rolim flet, na bihain beikim antap long paia. Dispela bret em ol i kolim bret i no gat yis. Olsem na dispela fist de em ol i kolim fist de bilong bret i no gat yis. Long dispela sevenpela de bilong fist de, ol Israel i no inap long holim liklik pat bilong bret i no gat yis insait long haus bilong ol. Bipo long fist de i stat, ol i nid long tromoi ol liven we ol i holim i stap.

Bikos Pasova na Fist De Bilong Bret I No Gat Yis em ol i save selebretim wantaim, na nem bilong ol dispela fist de em ol i save yusim wanpela o narapela long minim seim samting.

Insait long Nupela Testamen, liven em sampela taim ol i save yusim olsem simbol bilong **sin** we yumi mas rausim long laip bilong yumi.

fig-tree

Wanpela **fig diwai** em i wanpela kain frut diwai we i save gro long **Israel**. Em i ken gro klostu 10-pela mita i go antap. Taim wanpela fig diwai em i klostu 3 i go long 5-pela krismas, em i save stat long karim frut. Dispela frut bilong fig diwai em i yelo o pepol, na i teist swit. Wanpela fig diwai i ken givim frut tupela taim long wanpela yia, na sampela taim tripela taim long wanpela yia.

fishing-net

Wanpela **fising net o umben** em i wanpela samting we ol manmeri i save yusim long ketsim pis. Ol manmeri i save pasim ol liklik rop wantaim long mekim wanpela kain laplap we i gat planti liklik hol insait long em. Wanpela fisamen bai tromoi net i go insait long wara na pulim i kam bek antap taim pis i swim i go insait long net. Taim fisamen i pulim net i kamp antap, wara bai drein i go autsait long net, tasol pis bai stap na i bai no inap long eskeip long ol liklik hol na ol fisamen bai ketsim ol.

foreigner

Wanpela man o meri em i wanpela **forena o waira** insait long wanpela kantri we em i no bon insait long en. Ol strenja o **sojena** em ol manmeri husat i forena insait long wanpela kantri na ol i stap long hap sotpela taim tasol, maski em i no ples we ol i bon long em. [Abraham](#) em i bin wanpela forena o strenja, insait long Kenan. Bihain, taim ol lain tumbuna bilong Abraham, **ol Israel** i bin mekim Kenan i kamap kantri bilong ol yet, God i givim ol gaidlain long hau ol i mas tritim ol forena, na strenja o sojena, husat i travel insait long kantri bilong ol na husat i stap namel long ol lain Israel.

forgiveness

Taim yu **fogivim** wanpela man o meri husat i bin mekim samting nogut long yu, na yu stop long belhat long dispela man o meri. Yu no laik moa long bekim bek o long givim panismen. Dispela man o meri husat i bin mekim rong em i **fogiven**, o i kisim **fogivnes**.

Fogivnes em i gat bikpela kost. Eksampel, wanpela brata, taim em i no lukaut gut, i brukim wanpela ekspensiv samting we i bilong susa bilong em. Susa i fogivim brata na i no mekim diman olsem em i givim bek mani bilong dispela samting. Dispela em i gutpela nius long brata. Dispela susa, em nau i mas baim bek dispela samting we i bruk long mani bilong em yet.

Dispela em hau fogivnes bilong God i save wok. Ol manmeri i **bin mekim sin** agensim God i disevim panismen. Ol manmeri i nid long baim bek God long bagarap we ol i bin mekim. Tasol, God i laik long fogivim ol manmeri taim em i tok olsem ol i no nid long baim bek em-bikos em i save olsem ol i no inap long mekim olsem. God i save fogivim ol manmeri bikos em i [marimari](#) long long ol. Dispela em i gutpela nius long ol manmeri. Long God, dispela em i min olsem God em yet i bin baim prais bilong bagarap. God i mekim dispela wantaim dai bilong pikinini bilong em Jisas. Taim ol manmeri i trastim Jisas na **bilip** olsem dai bilong Jisas i baim bek God long ol sin bilong ol, orait God i bai fogivim ol. God i bai no inap belhat moa long ol.

Baibel planti taim i save yusim tok piksa long diskraibim fogivnes. Eksampel, sapos yu fogivim wanpela man o meri, em yu:

Taim yu wok long trensletim “fogivnes” o “long fogiv,” yu mas lukaut long ol dispela samting:

Yu bai nid long gat tok piksa long tok ples bilong yu long pasin bilong fogiv. Tingting gut sapos mining bilong dispela toktok long tok ples bilong yu em i minim seim olsem mining bilong “fogiv” long Baibel.